





小引

吳簫者字素音別號韻仙金閭之望族女也適虞為商人婦絮  
雪洒之墨花自誇才逸梅粧綴其玉粉無奈情多對鏡而崔貌  
常憐抱衾而王郎羞偶時欲琴挑司馬戶越崑崙避迨變姿託  
春心於金刻期諧素願寫幽怨於雲箋玉人入花砌而魂迷水  
郎吐艷芬而情惹迨後膠漆不啻鸞鳳以致風波動夫雀鼠條  
合條離赤繩之緣安在一生一死曠日之盟謂何萍絮之性隨  
颺兮負茲良友風月之懷沉水分哀此尾生係人深思良足悼  
嘆



目錄

允約

會後尋憶

佳期

惜醉

送茶

請赴席

宵約

盟神詞

答謝盟詞

相思

別緒

慰喪偶

私幸私憶

恨浪遊

寺遇

喜瘡

訂期

戒踏春





密約

不管

竊家書

索詩

戒勿歸

覓機會

罵郎

聞考信

惜別

還寵夫人札

問急

餽蘭花

問卜

竊詞

七夕約

山閣成

謔新娶

喫醋

恨郎不至

罰違令

郎病

玩盟書追憶舊好

郎怒札

發作

元宵約

圖長往

調停家事

夢會

贈梨花求詩附詩二

血書

讓寵

贈綃

憶前歡

設誓

陪小心

訴病

屏後見郎

夫挈

作手勢

寵卿



滑脚

耳熱

緣薄

艱會

不負心

離情

郡歸

答郡中寄札

明心

吳門失約

喜歸

釋疑

夜會多磨

慰傷懷

拋撇

慰別寵

圖機便

謀合

遭家難

奪臧

處變

事露

改粧

鑠關

執性

欲劄

欲縊

阻死

思累

遠禍

訴翁

遠遊中止

長別

強晤附詞三詩一

目錄終



贈藥編

允約

風欺露泣寸心為勞但莫學中道崔張可耳諸事已妥為恩郎  
情意骨化形銷不違寔處從今博得一箇真正才子不為枉過  
一生也前說原約假粧癡肯教真真醉倒耶  
情愛弟簫百叩子齊新郎

會後尋憶

三生神契一晌癡迷自愧俗流何當雅愛弟今愈想愈狂寔知  
是睡是夢早來餘香彷彿錯擬君懷猶爾呼名繼以潛然涕泣  
欲記好丰神眼花徒顛倒執手叮噓取忘片語誓同生死不改



初心但未知何地何時重期復合與言及此寸剪穿腸矣兩處  
相思身離神合仙郎神清骨瘦何堪以鄙為懷風露方侵幸以  
珍重自愛 情愛第簫百叩子齊情哥

佳期

內外湊巧每每得意真天賜良緣送來佳會耳慮有旁繞計得  
紅絲定其足耳 愛弟簫叩約子齊情郎

惜醉

宵來仁兄未嘗過飲何至逆胃多因懷結所致痛心痛心仁兄  
珍重玉軀莫使鍾情太甚以至感傷如此弟不忍見聞耳

送茶

豪情消瘦諒苦渴不減相如也手烹春雪聊佐一壺

請赴席

既然石翁有約兄何故不赴莫非奴子失候否眼穿腸斷速望  
行旌

宵約

此地最便今宵定成佳會速俟仙令飛鳧

盟神詞

玉田謹屆良辰要韻仙吳子而為之詞冀神聽也其詞

曰

北里吸三年而定配結愛相連東隣恣一笑以為媒懷情永託



祇應向月姮娥竊藥以宵奔為是經祇婆女臨河而散巧信儔  
侶之足慕爰終始之有期愧世濟欲落魄於西川遇冰仙懷芬  
芳於南國殊恩異數寵踰玉樹之班矢志盟心誼取絲蘿之雅  
用是披其隱願庶幾鑒於明神世濟之愿如此者昔求善偶本  
非登徒居室之淫夙慕閒情亦陋相如上宮之詐忽逢姝貌遂  
發狂癡每徧訪其年庚輒潛呼其小字芳流翰墨私吟詠絮之  
篇適觀雲箋竊異生花之管迨於鶯啼花外已驚荳蔻苞溫鳳  
咽弦中旋覺春葱色嫩抱柱閑尋夫屐齒垂簾遙想乎衣香眼  
波憑狹路之車心火發金堂之燭行時解佩靈非我欺懷袖置  
書愿惟君察冰仙之愿如此者纍纍石狀誠垂盼以新衣嫋嫋

魚肥重相將而白首本緣骨艷豈忘花燭之輝為恨情多不惜  
紅羅之裂顧予高義勉爾幽期思如結而心同意如環而運合  
博山煙重新團香獸之形油壁車輕往覓青驄之騎以至緘恨  
帳來時之遠夢回驚去路之遙鳥啼橋澀曉寒欲透乎疎櫺花  
露香深夕景復沉乎碧沼奚止感君情之不斷亦當怨我命之  
靡常鍾情若斯為歡何極從此以信為重自今以戒為先居惟  
接膝行猶比目之魚種附駢枝宿共聯翩之鳥或陪遊於春夜  
或緬涕乎秋風或繾綣乎含顰或低迷於隱矢或照隻鸞之影  
舞鏡非虛或印飛狐之踪熏香不撤或尋犬洞花源之迷路潛  
通或飲牛津仙客之浮槎欲近或弄錦帷之佩或乘青翰之舟



或描京兆之眉或寵專城之髯或重王家之誼即貴無忘或聽  
園令之琴長貧不惜或唱吹簫之曲或和擊缶之歌或蒙甄后  
之衣或蔽長衡之席以至荀令之傷神暗瘁劉嫺之刻誅深悲  
玉湖之化魄相依金谷之遊魂未散倘遭逢之不偶亦生死之  
疇欺更或韻仙而分衛玠之姿將春果而逐羊車之勒玉田而  
學吳施之態將晴紗而邀國士之憐更設向瑤池而作女湘皇  
之泪血應白謫塵世而皆男鄂渚之繡衾須暖洛陽桃李葉葉  
交花華山梧桐枝枝覆體允宮商之和合亦針石之相尋自茲  
使君曲陌莫誤蠶飢府吏廬江莫催馬足莫怨空倉之雀吳懸  
網戶之蛛莫生織素之嫌莫唱裂紉之句莫寄迴文之錦莫披

獻賦之金莫捐中道之崔張莫返人間之晨肇莫移飛諾莫改  
初心孰為棄德之寒盟即是離心之疾謹三生片石難留一笑  
之緣五色絲繩誰繫薄情之足生不沐其美春死輒抱夫沉寃  
斷石非誣顯斥忘恩之魄蒙顏難洗服褫反覆之情遂中心忘  
忌諱之詞莫知己絕嫌疑之跡玉兔牽牛共聞余語金妃玉母  
實鑒斯情惟念霧駕河梁隱隱去來之跡雨香雲氣殷殷朝莫  
之期花檻移春未許蜂狂鶯覺柳枝眠午莫教鶯舌傳宣使得  
恣情羅襪香塵顫翠鳳之雙翹適志更衣玉膩透靈犀之一點  
一刻千金而增價百年並穴以同歸疇負載書有如皎日  
盟弟世濟百拜啟韻仙夫人杖次



答謝盟詞

伏讀同心約盟恍如錦園繡圃芬芳馥郁若聽金聲玉振八音  
鏗鏘春明擲果寔賒潘氏秋思悲風不讓宋家吾兄真正才子  
情郎如何不教我不愛不病祇恐紅顏薄命消受為難然而死  
後魂亦風流矣來朝已刻乞君先往神前焚之弟則隨至訂盟  
倘嫌耳目衆多不必照應竟如不期相遇萬毋他疑尋盼素履  
春衣奈賤足素肥不堪持贈或勉強親奉則可聊以汗衫裊服  
二件馳至皆頃刻脫下垢膩未除仁兄少送春愁可乎洛浦無  
舟藍橋伊阻空憐形影從晨與昏  
辱弟簫頰首子齊才子情哥

相思

東君果為惜花猶遲阻駕多情若此不枉葵心刻捧也感若不  
忘腐草餘煙屢煩為予太息恩崇山岳何用懷酬惟有一片石  
心化作山頭人狀而已年來膏火煎心更罹多悔肌消如紙裹  
得數根清堅瘦骨向恃君溺情鍾愛謂我琅玕玉樹條條嫩柯  
可憐黃花同悴曉香明鏡零涕自憐然而血輔雖枯猶存喉間  
一絲氣尚可拈強豪素題寫相思但恨指莖如筋握管有鈞石  
之重每作數字必極酸楚便欲少停若此遲日俱拋置君寂寞  
何以為情乎偶因枯槁見憐故再試溫生之臺細陳司馬之骨  
以語同契恩兄祇宜題咏以紀此一畝煙雨落花之况勿作傷



心可也連宵皓月長門愁眠永夜豈無吹簫弄玉之懷援琴隔  
戶之思宛轉春愁靈心蕩漾幸則夢借高唐不幸則啼殘更漏  
揉碎綾衾而已矣傷哉傷哉不喻今日之悲何知昔時之樂從  
前事料此生難再矣徒留殘喘何益鄙人所以刻志死期欲圖  
美滿於來世耳恩兄恩兄忍無同志者乎最遲十年後必來索  
君去矣莫恠弟纏綿粘結苦苦如此寃也孽也夙逋於弟君所  
不得辭者耳來賜金箋俟弟指力稍旺為之爾時正未能承旨  
也 子齊親哥哥愛我

別緒

莫慘於別離也思緒悠悠驚魂入夢覺來餘香猶暖半枕未寒

嗟乎玉人雖去路之未遙恨無駟足不能追還耳曉風微透落  
月初沉烏試聲而嬌澀花含露以香深朦朧曙色黯淡愁心此  
真銷魂時哉翔鴻信杳霜雁難憑戚戚每懷凋零日甚我命不  
能久長得一見芳儀遊魂地下弗作怨鬼矣沉沉結願安得颺  
清風而雙舉傍蘭渚以相依得遂此期不測橫罹亦所甘蹈祇  
惟仁兄以隕黃見棄鄙人則肝膽難傾耳圖晤事日夜苦思奈  
何智昏無策仁兄謀壓六奇豈無良計何不一試通天手不辜  
高義亦慰鄙人生平雙眼也妾欲齋叩神明求賜撮合便即期  
仁兄同往可否可否只為玉人才貌費盡萬千心血未知後來  
光景如何靜言惟有浩歎雕玉環一雙付到玉取堅貞環取終



始君心如玉妾意同環世世連結視此為期臨紙嗚咽不盡  
辱愛弟簫謹呈子齊仁兄

慰喪偶

忽聞夫人之變不勝驚嘆何昊天不仁若此珠沉玉碎蕙折蘭  
摧人間異慘况於君乎但夫人既歸閨苑悲之無益矣玉體為  
重惟宜自愛勿用葺葺也祇恐兄鸞臺月冷鳳帳寒生角枕錦  
衾何堪獨處恨不得將身飛至君旁親拭君泪始可安心耳潘  
岳撫膺應多嗟悼盍便賜教以效巴吟佳詞紅豆新聲弟曾非  
知音安得百斛求珠為舞明君此曲令金谷主人一回擊節也  
仁兄愁緒紛紛而更為弟冒懷若此是以報恩自矢耳日因怯

病攻發前期尚欲少停俟商報

辱弟簫頓首子齊風流才子親哥哥

私幸私憶

連接翰教垂春有餘毋乃偶然之言乎妾懷來夙昔矣自霞關  
一見寤寐為勞對月長啼臨風掩涕結想清揚宛然我室一段  
閒愁無從告語耳妾非輕狂無賴之流亦非忘舊邀新之輩兄  
之才也情也風流閒雅來我清閨子建安仁合生一體能無  
人者乎幸侍荊州古人嘗輕萬戶侯矣邇來因兄絲竹無心饗  
殮都廢堪憐形影非復曩時從來不識相思滋味有如此苦者  
不如長往夜臺行矣來珍秘異佩以同旋永對玩如君耳



恨浪遊

捧覽情詞句句是勾魂妙訣鐵石猶動何況多愁多感如弟者  
從今不病死亦應害死矣只有一節不平處兄怨弟鱗死鴻枯  
不思量野外春郊拾翠尋芳令我行踪安遡拋殘絲竹掩過羅  
衣祇是青帝累人如此耳弟死畢竟要花神償命仰仗仁兄主  
持者况復春歸後人亦將別矣會期更無影兒如何如何弟有  
滿懷欲訴懸情清室奈機緣不偶君又浪宕春風全不為念使  
弟憂心如焚耳

寺遇

又做一場春夢空落得滿肚愁場如係最可憐迴廊宮殿乍相

逢欲言還止欲近還離眼睁睁對面如千里一聲聲催人去也  
留戀因無計更傷心臨行不敢道別待回頭再顧又是淚眼愁  
眉一則怕添君慮二來恐使人疑因此上掩泪含悲不告而歸  
矣入得門來昏昏如醉所問忘對所遇不知早壓着衾兒枕兒  
癡心再追歡夢裡恨愁多神散難成佳會短嘆長吁無聊無倚  
生憎那淋漓莫雨滴入心肝不由不碎却不知仁兄歸去更復  
何依且遭風雨瘦怯書生何堪經此磨折多是綃郎之罪矣懸  
念懸念 辱愛弟蕭頰首恩兄子齊哥親

喜瘡寺遇次日

弟因昨日出門飲得幾甌泉水回家凝睡至曉不覺寒侵方知



腹餒端的是半死之人忽然又作瘡疥別人有病愁煩不已我却生歡喜總是多活多受一日苦况早死早得一日安逸昨弟徧叩諸神念吳綃非為求壽求福特以求死而至死無所為欲來世早與齊郎為伉儷縱無食無衣心猶樂矣志誠以祝神靈必賜祇愁仁兄功名富貴為念何能輕棄祇向鬼門關待君可耳更得佳作宛然描花下遊魂非才子孰能為此如一派清泉流白石千峰秀致會煙霞何獨屈宋擅絕千古哉梅花梅花非綃一片苦心結識天下一箇風流俊俏的才子齊郎誰得此錦心繡製如此可羨可羨墨絲一縷弟自手紉持以奉獻不誠可意否

辱愛弟蕭頰首恩兄子齊俊俏書生

訂期

知君駕幸豪門弟又添一段新愁矣此行相逢知己却是花畔金谷玉樓怎能去去便回可憐拋的影冷清清香殘花燼撇的人愁脉脉鴈斷鴻稀何以為情耶從今免不得設一定局矣三六九是君文會四七十是用功心苦之餘惟有么五最閒即以相期可也計除二十四日其餘六日任君醉眠芳草不可悞事此規一立欽此欽遵外求凰事弟本心相勸况天生此一副美貌奇才若不配以風月佳人誠為可惜願君忠之莫待後日思弟語也前已說過千萬不敢往春郊遊戲如何昨日又在山前罰令之說如何設處速之速之弟學做一二首詩詞久欲求教



恐仁兄笑壞不敢漫呈昨以梅稿探元一味謬贊不肯提指豈  
愛我之言哉待兄亦不過貪兄高才耳坐視暗笑若此不敢時  
來獻醜矣

戒踏春

所云罰令欺弟不知竟欲捉弄我耶如此却不自罰有何便宜  
弟尚有主意未便相許也花神償命豈無為而然因其故縱妍  
華垂妖吐粉勾引郎心日尋春陌累我時常水米不沾顏色俱  
悴畢竟要死這相思病裏哥若可惜花神則莫踏春郊可也明  
日尚欲少完俗事不能早來諒之

密約

同心方勝何事前日故意講道學以嚇我耶弟久矣為兄病懣  
心虛胆怯倘被訝死兄何忍乎從今幽期不遠矣須方弟不報  
復者慎之慎之來夕設一小酌相邀兄可假醉留榻弟密遣諸  
奴并計誘旁撓人潛赴仙郎成事大約在宵分子刻也前領教  
密室已定曲而多門特為玉人樂地勿令虛度可耳幽懷百種  
總俟良時

愛弟蕭頡首巫山玉人子齊僊郎

不管

纔提報復便說驚壞哥哥難道前日長篇不忌嚇壞了人也天  
下情郎是安然受用者偏弟費盡心力哥哥那裡知道從今弟  
亦不管矣



竊家書

竊人家書當得何罪若不看相知分上險些兒做賊拿住弟醉欲死萬不能得除非是齊郎口親含一滴美甘甘香噴噴沁入酒腸便醒來耳

索詩

昨觀文作尚以莫觀君陽春之和筆花墨艷的的仙才兩玉人酬和如流幸多賜療俗望望弟酒病稍可心病越沉長宵皓月四起秋聲泠泠麗琴枕邊作伴耳夢語頓覺綢繆想緣地近神親也不得私自逃歸逃歸又要賊論夫字文玉故云文作後文兄文君做此外云卓此却文君之謎語也

戒勿歸

兄何故去便不來來即便去強留也要強去想明日料易欲返宴爾新婚苦苦兜留雖是撓人歡處不知體量但近來弟傷心特甚聞君歸去不覺刺胸君行一步遠弟心一時刻何忍何忍冤孽纏君可奈何可奈何

覓機會

蒙許機會切切心頭兩日刻望駕至而不可得覩月懷人因風泣訴相思淚弟知幾許聞至雲踪必有奇計洗耳以待

罵郎

有甚喜音可俟且待我罵幾聲出氣再處普天下那有玉田這



般不識好的油花賊險些兒將老婆活活氣死除自己罪過多  
端反來圖賴着人我竭盡平生之力又云做作真正要氣死真  
氣死俺祇為個渴相如愁雲怨雨因此上哲夫人密約偷期逢  
非容易最苦是一帶峻巍巍巖垣峭壁插翅難飛惡狠狠猛虎  
狐狸張牙來戲念恩情難棄每日裡牢費心思陪氣力安排巧  
語廣弄神機成就歡娛鶯儔燕侶不銘重建之功勛反將人無  
端陪罪俺今日受些懊惱之氣到其間肯饒玉杵仔細仔細

聞考信

夜來正屬愁鄉忽聞府案仁兄第一文兄第九項刻間煩三俱  
消喜狂欲絕諒玉人亦必欣慰矣快極快極弟從此可加餐也

但兄即日榮行弟則未免有陽關之恨歡期未邁別緒又牽人  
被利名何時得已乎可憐可憐行期已請過云廿四吉期可行  
又不敢強只得捱下一日耳巫雲夢斷能不悲傷弟真有百日  
之願以期來生美滿令心期將足肯一日付之東流乎且再世  
是誰受用原是玉田何不免此頃刻行以定生生世世久長之  
好不宜早早講定然省爾時惹氣除此為罪事事依兄

惜別

昨別無端乃為弟淹遲一日離顏况味淒其不必言更屬新寒  
初透煙冷屏山銀剪舞聲蘭膏斷燼孤眠未穩度曉連昏唯以  
邂逅雲踪細細追憶撫以香枕覆以鴛衾如何得我玉人也五



更神倦一晌昏昏日出東南華胥夢止未足耳所謂中心藏之何日忘之體中稍旺調藥為勛卓氏亦甚相訝謂弟從來不肯嘗藥何以苦口如此豈知全是情郎之力因思君舉動便足引魂深思靡竟何以報有心人憐重耳然而吹扇業波易纏膏火君之罪耶弟之罪耶亦可以為戒也榮行幾時尚欲少陳種種家兄雖則和結一宵為君齋期未滿敢違此戒是夕思神明鑒別非誑語腐舌苦腸可也弟唯恐心期不同洗除冰電要於神明君却不以為心如疑如棄弟願君勿忘神盟也家兄指其夫

還寵夫人札

比來欲入郡城時願君不以離別為憶寵夫人華札藉手還歸

乞賜珍藏完其璧彩恐周聞有以十五城相市者耳齊夫他遇

問卜

玉股有何貴恙不生緊要處否弟宵來沐體洗心將以望日親叩神明願息郎早安佳期無阻至誠所感靈爽可通安心安心熟覓連章刻骨銘心思郎更添幾重膠漆也有心郎如此豈非弟之連城重寶乎謝謝

餽蘭花

同心金蘭正在痕青小閣豈非佳兆留以奉君此花香艷足以依傍風流更當賜以佳詠耳前無聊月下弄一小詞律體博恩師之憐且祈斧正乃以一味褒譽如笑如嘲豈望於骨肉氣誼



或思師自有可意門生故不惜指語頑石耶負悔抱慚以後不  
宜如是也空觀柳絲誰當共折行行重賦黯欲銷魂

問卜

靈哉水部恩神弟久矣微誠欲叩行止今早達靈堦爐煙未燼  
燭照光搖知僊駕已去矣弟添香即告曰玉田已經懇禱冰郎  
重致素心兩人果有夙世種緣今生結契來期匹偶莫改莫移  
者願得吉兆果遭逢未偶幽期不終死負生離傷心慘目願得  
凶兆再拜致詞乃獲桃梅重熟之應一一揆度得意有時且神  
助情如此亦不愁仁兄走眺矣但未知仁兄所得何如劇叔青  
帝常為主分付東風莫浪吹神契冥冥敢申幽鑒

竊詞

事機有變昨晚偶因思兄填綴小詞一二首正欲求後京人喂  
藥竟被袖中竊去幸得尚未指明巧語支吾大懷疑惑今風波  
且息矣每念情兄仁誼如膠弟身何惜萬死必欲圖成此事凡  
為女子不死於節則死於義弟豈有兩失耶若今歲不得見兄  
當北面自刎以報大恩誓不再生於世君須見諒勿負鄙人之  
志可也 弟蕭頰首子齊親兄

七夕約

今夕天上佳期宵分時弟亦當傍蜨魂而至所謂重門不鎖相  
思夢隨意到天涯



山閣成

入痕非弟不情奈無藏春隱處喜得山閣將成此地寂靜麗室  
紅塵隔斷大約鵲駕成則竣役矣可與雙星同渡俟之俟之

謔新娶

聞君三星在戶矣弟今宵笑倚鬱牀潛訪鴛鴦夢准擬魄化莊  
周祇恐神女陽臺正忙不得清心入半閨裡也咲咲

喫醋

兄果喜酸弟當來發號施令矣明日起便捉到痕青澆花寫黛  
弄粉和脂染翰裁箋熏香和酒一不得風絮遊踪一不得強項  
使氣苟有觸犯軍令從之親親能耐否原來尚未知人弟託交

肺腑曠月經年以來未識情性但慮我一味喫酸寬極寬極

恨郎不至

昨日親許早至弟未晚即便梳洗相待此何時也尚未見薄倖  
郎決今番失機怨只怨慣失信的陶玉田不干他人事也好恨  
好恨早知誤事亦不至怨君矣如此命違亦是蒼穹妬寵但弟  
念此生已久歲月無多必得再邁芳辰連宵暢叙或君來我閨  
或我入君室交頸聯唇并棺同死化為南方之鳥東方之魚豈  
不甚快祇恐君未必見許耳不然亦不敢唐突只因昨有早約  
曉起徬徨午後未到沉綿鬱結和衣昏睡醒來意君至矣復理  
殘粧往識春風一面座滿俗客不見清種齊郎此時何能不恨



是則愛兄之至每每自怨耳諒之怨之

罰違令

弟自遙面後百病相侵久塵粧鏡初五日滿望幽期強臨梳洗誰知又屬畫餅空闌納悶獲奉鸞音喜謂是和氣丸却原來是驚心彈被伊抱怨不過便欲自盡思量又撇不下又恐伊道真箇不肯憐惜准准笑了三日三夜行望醉夢無刻非思纔尋得機會如此如此而量度而行行寒號衣不可忘帶者還有一句話五期一封送來兩次沒處推尋端的向誰行留戀此是第一箇五期便違令如此速供出示罰不然便將此會准折矣

郎病

一聞玉體違和神魂俱斷矣天乎神乎齊郎若果有深災吳綃願以身代是因前日不合性急以言直告至使親兄驚恐受此大累弟應萬死萬死總亦是命薄有累親兄萬一勢危不可隱弟急寄一信來弟或吞藥或自刎必欲親兄知弟死期以得安心同往非弟敢出此不祥之語因愛兄之至惟恐有失五內自有一種難摹難寫之况輒忘忌諱耳諒之諒之

玩盟書追憶舊好

恭聞玉體稍安弟亦整失眉头之壑矣今夕月明辰吉可以展玩盟箋焚香盥手扃戶理思細讀一過不知李青蓮何事又遭謫下也玉妃何處沉香亭醉草時曾來捧硯否耶從今生佩明



珠死隨含玉形銷骨朽有如此盟莫說雅愛萬千難以圖報即  
是裁箋時一片有心量山下之新鱗問扶風之織手繡成宮體  
絲吐紅毫綃一庸流陋姿何當名公結春至此遙望雲端稽首  
叩謝者果有雨痕雲靄花露異香亦何從知之豈前宵君懷曾  
嘗着滋味故耶流言事皆君日蕩春郊以致鴻來形迹難掩於  
目明春定鑄一最禁戒指禁住滑脚可否已後約會須兩家嚴  
秘共圖永好若言畏禍灰心則中懷匪石決無轉理萬勿過慮  
萬勿過慮猶憶去春屈駕南州邂逅花前遂如夙契爾時君猶  
未察弟亦未敢妄為俟駕或言旋則私行以尋荀令香履浴蘭  
節近晝步霞闕見君案上一精雅雪端烏羝什襲者弟竊之以

歸意謂君來索即此是武陵花片矣漁郎無意問津杳然已而  
復出小扇求題君又寫古詩一首各其瑤作日者新筆方縱弟  
折一枝潛來持贈輕敲疎竹忽逢人至只得含泪旋闔惆悵移  
時嘆其緣薄正欲收拾閒愁從事羊公種壁矣誰知鴛鴦債重  
風月擔輕是夕家兄挈遊玉館已見焦桐塵網零亂軫絃始悟  
病鄉日月已多遂致宮商荒棄無聊生感一再鼓行孰意子期  
已結契高山流水間也自此得君佳作珍如顆落明珠吟諷徘徊  
不覺才郎春心盡露耳詩媒神契千古自謂不俗要之傾心  
在風流婉約之餘酬和在筆墨畦徑之外天寔為之吾輩豈偶  
然者乎往楮纏綿聊因道及惟仄棄為是



郎怨札

晚來欲尋圓夢強試春眠恰遇多情正待訴愁無限忽聞鴻歸  
驚起拜君怨札謂弟明明犯罪弟實無罪然不敢辯惟有請死  
台前而已祇是情有可原者君在內闈豈不聞外廂如市豈稱  
幽歡倘有人來潛踪何處且先經告過仁兄香戒未滿宵宵獨  
處兄云如何又親了一個葷嘴兩兩笑開分手如何又來見罪  
君云不用我假憐惜假啼笑君固多真者但弟生平不喜假託  
愛以來不過一味真癡情總是君之情人多賣弄何並倘厭棄  
鄙人何敢相強若欲生離斷斷不成者來宵左右力能美滿倘  
已興盡亦任尊裁新正五期

發作

春來見君二次果能棄置弟否依此三誓亦不難但弟不能偷  
生負義唯有刎頸自申不然將以前賜香囊結束矣急候令旨  
莫作語言進退以致死不得瞑目但知做情郎十分大樣不思  
情郎小心處真心耐志延捱尚然作難性急是何處用着却不  
敢虛奉承恨弟也沒用仁兄也不可習以為常戀了別人誰似  
第一種矜憐愛惜者識之識之

元宵約

來章語氣未平應不至恨斷薄情人也弟亦得安心一件矣何  
日索君一見腸一刻而百斷魂須叟而九遷恍惚沉吟如醉如



失良人憤怒反目不常豈知因此風波仗儷蓋輕懷人並重嗷  
嗷阻懽愈為生計矣若云宵宵夢裡不比尋常畢竟如何光景  
可以述示否連宵金吾徹曙門禁頗弛可以緊圍乘便晚風寒  
峭加護為佳 愛弟簫百叩子齊可意親哥

圖長往

惜別以來啼痕殷碧歡情笑語難再得矣月明清夜為送腸刀  
仁兄此時含愁何限可憐一片清光照人幾處離別臨風相吊  
何以為懷猶憶良宵潛踪赴約聞兄竊嘆弟已魂離恍惚神驚  
衷言未吐兩心運合四股粘連寔知剖剖在何時也至今惟有  
寶鑑形銷羅幃泣影而已每憶仁兄神儀舉止種種風流詭浪

酬嘲毋不韻絕思之已屬銷魂得之何難忘命欲翔無益欲止  
無心力已盡矣計已窮矣莫如長往以就他生亦可以傍言窗  
溫香得近亦可以暖鴛衾好夢相依豈非快事乎思此樂境焉  
肯久棲狼穴料應泉臺亦不遠矣恨癡情未盡尚欲再圖一晤  
肯謀之否小影暫付來容傳一肖者奉伴情郎祇恐憐却新人  
拋開舊影使卷中人有白頭之嘆耳言雖如此諒兄非薄倖之  
流不為慮也愁心泪眼筆底模糊

愛小弟簫頰首子齊新郎

調停家事

辱教題紅果爾忘憂消悶寬胃益胸正是相思病對症方藥頰



使煩愁一洗矣文君雖行弟原不曾少伴寔不相瞞夜夜抱着  
一箇恩恩愛愛知情識趣的齊郎而睡十分親切便一世不來  
何慮哉到不如尋個計策與兄做幾夜美滿夫妻文君寔甘獨  
守孤幃斷不央求伊者矣兄要與人調停家庭事恐怕只些男  
人悔盡了氣一箇箇老婆的心肝却被這張油嘴說騙了去那  
裡是和事更有一節仁兄風流情性縹緲才思莫非因弟調笑  
之言早晚收束下次知罪不敢來犯矣忽聞駕幸霞關又悲又  
喜喜的是親親必將個信兒來也悲的咫尺天涯杳難會面思  
思想想恨不得將身化蝶飛來牆外以為君燕輕度簾帷望着  
天邊垂垂的淚手抱着膝兒心懷着人兒昏昏癡癡的睡却不

道我意中人在何處尋消問息幾層門戶幾幌踈櫺兀的不是  
雲山萬里一霎歸遲又累親親擔風冒雨未知玉體如何

夢會

仁兄別後安否宵來又得玉人作伴迢迢夜漏團結多時撫愛  
有餘何殊握手只是醒來依舊淒涼如何是好弟有一言相囑

贈梨花求詩

頃踏寒露見梨花逐笑不減春煙素娥鸞影中都無寒食斜陽  
之外此花亦是風流也更念春時低鞦逢迎與玉人佇立樹下  
以後則風波漸高至今愁魂空瘦耳偷彈珠淚卓君亦頗頗鮮  
憐因而相對慘然者竟晚敢携贈一枝并求佳什弟亦為卓君



分韵密思且俟才子吟成共送楊家泊雨耳

附詩二首

聞說梨花好梨花妬妾粧摘來蟬鬢畔相並昵情郎  
和雪蹴花枝迴風颺鬢絲驚看比顏色香粉嬾曾施

簫叩子齊親親

血書小春十二日

弟自幸遇國士以來披露腹心曾無顧慮因南歸拜札屢多含  
蓄意謂情腸冷落且聞有好姻緣惟恐攘愛又度仁兄真正絕  
我故每每以假探真豈真堅築疑城者仁兄如此性急遂將玉  
指刻損瀝血明心何忍何忍啟絨時心胆墮地且悔且驚喜得

暖氣未消芳香正烈弟細眎益慘加以密愛輕將舌尖舐之再  
用瓊漿洗下徐徐入口恩味沁心逾於飴密從此盡釋所疑而  
益增恩情十倍恩兄恩兄今刻指剖心見骨血之愛他年弟當  
刎頸報兄見生死之交皇天后土寔聞斯語俟之俟之玉痕好  
護弟正膚寸相連耳良晤不遠若仁兄得暇遠來則此處可少  
圖美滿無暇亦不敢強也草草俟來命若非貪兄恩愛則焉肯  
千里馳歸即此可白鄙心矣紅顏命蹇步步生撓明是機緣不  
偶可恨可恨弟必欲効死以就來期今生苟得與君痛飲千杯  
豪吟一絕即快然長往矣連宵樂事斷不敢誑歸棹在即俟此  
行細語耳



讓寵

南歸以來幾宵癡夢楚臺歡覺來依舊長門怨今日始得東君  
真信至也前日所聞駕遠亦是有形有據者已成虛夢今日莫  
非又在夢中否為恨情多恍惚難分真假如何如何半載離愁  
正欲訴冤知己奈君方有得意佳人不樂聞此窮愁幽恨之語  
反不敢題只是弟平生不奪人之歡早知有此一段姻緣寧敢  
分寵使恩兄有薄倖之名皆銷之罪矣願讓願讓但欲弟負義  
辜恩寒盟爽約又是不敢者惟有一死謝君而已只有一件佳  
人宋子齊姜恩兄潘珠夏璧一雙兩好千古所難如弟輩庸陋  
無姿亦欲結交名士豈非可愧乎乞為弟揜此一段醜境感君

不淺餘俟面悉

贈綰

蒙賜白絹鮮妍芳郁精雅可珍何處得此佳物也今宵多屬虛  
度是極不得已出於無計所謂對面巫山可憐可憐仁兄功餘  
且須早睡以輔心血斷不使兄空過莫指望前日容易拋人去  
也弟至今怨氣未平且須見留議處須酌之

憶前歡

前月今宵便是得意時嘗記得春水兩鴛鴦迷香雙蛺蝶翩翩  
遊雲逐雨縱宕風流今夕同是佳晨淒涼暗度如何穩睡無聊  
自遣細憶歡情覆枕和衾如親玉體因而一夜與兄纏擾有多



可咲者且俟幽會取作笑語只恨昏時睡遲以致春風頃刻耳  
悔甚悔甚玉漏方稀曉風猶怯重門空掩銀漢橫斜未知故鄉  
迢迢何由度此語我語我所謀但有患勿悲無禍勿喜則弟斷  
不惜捐軀以從者日來有他媼在內且再商  
子齊妙人哥哥弟蕭叩首

設誓

忙歸作別知探鄰為急耳夜來露華月好果稱佳期但雲雨墻  
高如何便度弟宵眠耿耿亦設三誓矣一誓死不復見玉田一  
誓收拾春愁一誓霞門路永不行踏行時祇甚傷心也何苦何  
苦縱有十丈紅絲難繫薄情之足但不如無心芥木任春風來

去耳命垂呼吸永別後亦不勞臨吊奠假啼假嘆君自戀塵網  
功名弟自叅法蓮高座凡心俱廢垢膩冰釋矣深恩莫報他時  
稱贈藉手封還怨恨填胸揮毫難盡

陪小心

佳期迢遞非阻梟鵬只因齊郎使性將人折倒一魄懨懨神荒  
力倦何能虛鸞駕赴約鷓鷯仁兄必欲一晤亦無難處待將前  
日怨絨一一換來修寫一封哀憐密啟送至痕青陪箇小心不  
是道狂童萬萬得罪伏乞大度海涵如此則病除神旺幽期不  
遠定使冰魂僥倖玉郎一夕也不然足下穩守空床是樂隣禁  
約於我何與咫尺巫山便夜夜同榻亦不可知况不比為處天



台路遠疑慮疊生乃反言供出耳

訴病

花前花後沉卧至今瘦骨無多中懷百結聞君相知正樂何暇  
遠念昭陽恩顧垂憐始陳泣涕耳弟整整絕粒二十四日矣前  
者猶飲清泉幾甌近來亦減是以形神委頓生動蕭然昨晚左  
喉又突一塊如哽如咽肝氣愈焦多病多愁未通泉臺者一線  
也仁兄亦緣何事襟懷鬱鬱可示弟相為分憂否

屏後見郎

今日踏家園一訪南枝春色便趨夕陽影裡緩步歸來昨日一  
番固知兄必受累果然果然第一夜夢魂顛倒曾覩相如病色

偎抱相依嗚咽乍醒項在屏後私睹玉枝清悴可憐何異夢中  
所見珠泪潜然恐為人覺因急歸香閣親曾見弟否珍重珍  
重

夫挈

雖喜集挈幽關恨弟沉疴日痼李夫人不忍一回首重沐武陵  
恩愛矣親親可憐從此只須懷夢草相思何必返魂香後會非  
遙願言自愛

作手勢

兩兩牽牽雙雙病困終何結局負此情逋得娛花對酒半刻一  
時同死同歸含笑入地矣前幸非遙目挑心死良人側近群從



譁然只得強作無情物也畢竟忍不定與兄作一手勢幾被窺  
破入痕轉輾愈覺無心顧影婢娟低聲尋喚如聞君至留連夢  
緣非弟相持即君見挈深情一往多有雙飛久遠之談不知此  
何徵也應是想濃結成顛倒耳小影整返非有別故因邇來朱  
顏非舊綠鬢朝新不忍再入鏡中故少刪舊稿聊抹丹青待學  
鶴灘一手作陋質耳描成奉伴勿戀戀此卷也

寵卿

寵卿六字韻絕非得足下第一名流何能得此品題芬頰達於  
神馳如覩傾城人至矣弟久希萬戶聞名更切記得詩云云  
合楚仙佳字吾兄必曲摹妖麗而名之如此佳人無負玉郎粘

愛矣弟煩煎在心猶可破喜仁兄當以知情為念莫嘆離人

滑脚

戊寅一春日為歡郎生事懊惱吳門豈知虞山踪跡且滑脚釋  
禁多時矣何事還提任君日蕩春風正是少年得樂之日莫為  
弟錯過韶華良深悼惜耳

耳熱

暑氣方消新涼襲人真良夕也因頰愁城無心裁答更未知玉  
人近緒何如耳邇來何至音疎使人雙眉如擊中宵詛悵耳輪  
覺熱否別來近况縱有玉粒金漿喉寬若哽豈是纖腰而學蛾  
乃憐才以至於深害如斯耳形枯神朽莫雨殘花委之西風黃



葉何忍何忍

緣薄

兄為何不別而行恨弟不出故爾耶昨宵豈忍不赴霞閣因夜  
門扁無計可出含愁假寐早來正欲借園闌一面恩兄聞兄已  
歸不勝悵恨緣薄如此再不必妄想矣衷腸縷縷哽咽難言怨  
氣稍平當以相酬耳 子齊恩兄弟蕭頰首

艱會

本緣命薄反眷高流何況連宵誤薦荆王夢中狂魄犯罪遂將  
生平福氣折盡以至今日莫云歡會遙遙一面亦不可多得機  
殼入來又復錯過因知此生難期得意矣何以孽絲難繫日來

更覺種種傷心色色慘目漫謂遣愁思更入骨不如從夜臺行  
好將信兒恹恹惶惶的寄也鮮魚二尾奉酌杯酒幸留之

不負心

君恩浩蕩何以仰酬惟有不負心三字可效萬一也然春島已  
少成今但須卓氏行旌耳

離情

重疊離情連綿別恨嘆行色匆匆無由一訴及不忍提矣明日  
陽關扁舟弱水何堪乘載許多愁緒也弟來期遠過季夏近過  
夏中無事懷歸祇為玉人牽惹別恨萬乞恩兄置去薄情潛心  
經史君情落落弟亦好寂否則徒然兩地迢迢膠結莫解耳



郡歸

齋居近况茶苦猶甘滿眼韶華盡從流淚中過何嘗知是今宵  
春夕也急欲與君少叙花前莫因相去咫尺致負鄙意所恨歸  
遲青帝又將匆匆作客矣如何如何弟到吳門雖則傾國骨肉  
奈伊人一方祇是愁顏暗地春風鬱坐唯有無聊清夜月明徒  
勞展轉每過天邊必行私擬平安喜得會期勒成舊館不勝躍  
舞即託歸風百里孤征神驚跡濶是以眉顰心捧候問少遲亮  
之亮之携得虎邱新茗數葉并拙草小扇一握春衣一襲未量  
寬窄乞試來時

答郡中寄札

遠勞大人冒暑而來感德非淺拜啟鸞封不惟無恨於薄情拋  
撇而反懷德憐才今思愈密天下多情恐未有如我玉郎者矣  
感刻感刻但可惜玉人一片清思將來混入此滾滾煩啟中所  
不忍也丹敬方殷唏噓多感恨不得分身縮地一見玉容耳旅  
思縱橫附乘片羽

明心

前辱教相思比翼正屬煩啟中未遑諷詠頃拜命寵眷隆深死  
以為期斷無生背弟寸心久已籲天籲神冥鑒格者何事邇  
來每有中道棄捐無心矜惜之嘆伊何我罪職罪奚由弟固非  
陌上柳花今日懷抱止有交於國士者憐才洽契慕義偷心未



至取輕於君豈至少侔於俗水清石見芳盟金石不渝也自吳  
門返痕以後長懼棄言惟竭力剖腸神翰鬼運度崑崙於明鏡  
指星合以龍文少暢離愁克諧夙好君也願捧甌犀而剖血妾  
也吞雪澤以斷酸此樂此懷孰云可讓再結重來無緣良晤繡  
戶空標竹葉羊車別伴深宮自此以還心摧欲絕隱忍唏噓獨  
泣徬徨侍從莫能仰眎者矣羞彈齒頰付花事於東君則寔有  
微情豈曰黃昏改路逝水東流之咎乎皇天后土儼臨此時弟  
懷二心願邀疾殛邇來祇欲一識寵卿此則得仗東君之力莫  
作閉幃檻護令多情小姐亦欲竊效窺探也千萬千萬

吳門失約

初一晚吳門親許後會因即分手未書鄙懷何以望斷西眸竟  
無踪跡從何處旋旆耶弟自閩門望至江口七日七夜血泪盈  
盈隨波湧沸昨從江樓回首東南每念此生牢落愁城春風何  
日遂欲捐軀魚腹泣訴湘君一俟人寂即甘淪棄誰想孽債未  
滿江神托夢文兄半夜驚起禱祈有退歸山路之語因改從陸  
行幽願未完馳驅車馬之煩前恙復發憔悴支離渾不是別時  
模樣若一旦隨風豈非負郎恩愛乎傷哉征人望裏山川愁中  
煙雨忽然念至私語依依聲呼我歡歡玉郎乘此良時共冰郎  
片刻不聞君應四顧淒涼憑夢無聊聊以君所賜之物玩弄情  
至此時不由不嶺猿啼斷耳中秋後准歸恩兄行樂有懷毋以



鄙為深念途中不便多語無任依依

### 喜歸

秋期心印千里神馳每聽悲鴻驚魂欲碎弟因身不自主唯恐  
愆時辜德思緒懸懸且念風流腸肚不堅牢半載相牽得無中  
斷心如芒刺百計求歸雖則心血幾枯且喜得作透籠鸚鵡矣  
重九駕車長往不下數日癡心以為前途便得相晤孰意佳音  
杳然歸來自恨自疑忽聞駕返遣伴申候兄再理前聞寔無人  
道乃是莊周夢中語耳傷心傷心試期遠近如何乞示以安望  
眼弟新歸便聞流言一派乃從尊寵妬口所傳鄙人與君金石  
之交何慮閒人離間縱有浮言如刀截水其可斷乎祇願君情

莫改弟負弟一點苦心則死之日猶生之年耳三秋悲怨尺簡  
難馳除是面陳又恐臨時哽咽惟亮示不宣

### 釋疑 初七戌刻

玉人不樂遊遠弟復何愁從此危疑盡釋有時盈雁足無事渡  
魚溪不至相思害死留得一口氣在覓得同歸之日鴛鴦長夢  
從此止願有情眷屬化作鷓鴣蝶蝶兩兩相依甚幸甚幸征帆  
早挂枹鼓頻催不盡欲語

### 夜會多磨

怒歸必恨斷負心不赴也昊天不弔寔因蜂蟻無情鄙人薄命  
有累尊親蒙霜宿露而歸早知夜會多磨悔不昏時盡歡一刻



懊恨懊恨早來不見玉人急得神魂欲斷膚體傷刮幸有以慰  
我倚枕草草

慰傷懷

昨日數行託新鴻致送亟得歡信以慰傷懷不意沉沉一日焦  
火焚心肉肌瘦裂茹荼飲食荆棘悻衾嬉笑悲歌芳華愁色種  
種苦况未能一訴也天生尤物儕輩尤憐媚骨柔情竊聞仙才  
之號何得不為兄忘命圖歡傾其夙昔痛恨今事勢若此一點  
癡心親君骨肉素望情始而義終萬勿因禍而割愛助全鄙信  
生死啣恩若以小忿生嫌棄捐中道則千秋萬歲而後未必不  
為多情悵然弟所為不忍者此也惟兄裁之

拋撇

來詞意興索然得無為禍患割情耶幸別歡美滿弟會艱難撫  
邇而忘遠兩意春濃雲魂雨夢忘却星前月下血誓幽盟矣但  
予心匪石不可轉也任兄拋撇莫改初心常來凌亂春心本含  
慙愧然而兄亦怨不得矣怨只怨那一篇招魂賦牽纏孽鬼牢  
繫追隨今日如何便送斷此首宿昔冤仇生成定偶今日不完  
又為來世之孽苦苦懽愛苦苦煎愁奈何奈何

慰別寵 二月十五日

含愁知為楚臺雲暗魚波不通諦想多情何以為慰弟向來嘆  
天下緣薄命薄未有如水郎今乃與寵夫人同恨益以灰心然



而夫人福大阻患同方重接斷續不比多舛冰郎無緣承寵以  
至風濤驚恐禍解無時者然否然否仁兄可以寬懷莫至沉疴  
使同盟聞之為戚戚耳新詞秀麗絕塵語語非神仙中人不能  
道弟初學綴弄今被才郎壓倒如何如何謝復外附粗芥一瓶  
少潤吟腸

圖機便

一別月餘窮愁莫訴歸來復多不堪悵緒亂絲失候新社為悵  
玉體多安想吉士春懷仗春臺風月可遣可一一示弟否家兄  
每欲逼弟同行屢以推託留戀飛言相中但六親老幼無不痛  
阻豈敢輕身至於私心內顧者此行未知遠近縱然得兄來時

自請機便可以圖歡猶恐玉人將來燕新婚肯向海角天涯尋  
雲逐夢否今日雖艱良晤猶得時至音書吳越殊塗音沉無計  
眼穿腸斷抱悔安從終不知戀家安穩也家兄悻怒詎許不別  
竟行忍心如此弟意亦冷從今斷去為彼之懷戀畫揜長門聽  
其即次而已冗次不盡鵲伺回音

子齊親哥收季夏二日

謀合

弟萬萬不能置君願言握手不然只在數日內聽訃音也連日  
春郊相挈無情女伴日斷嬌紅散綺逸韵笙歌泪下盈珠顆顆  
碧血情至不堪疾歸昏卧細尋枕畔遊魂念玉人覩此韶華得



少寬懷抱否醉中分袂半越月旬緘書謾慰寒暄幽會絕無商  
畧才郎何以為情弟行前不及矣行後切須大展奇謀安排好  
合一暢同心之願若論已前幾度幽歡弟獨力經緯亦該兄費  
心矣苟得主意不辭執鞭以從

### 遭家難

忽遭家難禍至莫解家兄欲竊弟潛奔所投應不出百里外欲  
少晤仁兄一申陽關之恨未知兄肯入痕青否速乞示我好為  
脚地

### 奪緘

兩月不覩瑤章魂勞夢斷正欲潛修尺素寄以雙魚忽聞青鳥

東來怵躍神怡即從呼詢無奈羅截梟鵬方待作計華東已落  
賊手矣影借多端祇誣百變弟初猶誤信因草一寸啟函入香  
中多囑行人好為道意不料亦遭賊劫弟尚在夢中已後來人  
至別郵知會始行追究寸啟已獲華緘竟云灰燼賊奴之可恨  
如此寔不痛心治之以威終為不吐不知來札中意思如何有  
不可示人之語否仁兄若能復憶弟祈示下為感

### 處變

自閏初到此離思未嘗片刻可遣者且上無骨肉可依下無婢  
僕可使日御虎狼欲吞欲竄環視四方舉動必察光景如斯何  
能釋恨以至每日飲水尚覺填胸終宵展衾曾無一夢病深入



骨盍望可生祇有負君深愛為啣寸效無從更貽多患只此為恨死不得瞑目耳此番不遭賊篡歸時定與君為永遠之策伺之小物一二寄到否邇來寒暑不常風雨時至吾郎骨瘦沈郎珍重珍重鴻音遼濶速勸征人

事露

踪跡既着安保無危縱然收攝豈久安之計哉竊聞聖人不凝滯於物榮華富貴等浮雲耳貞女要名於沒世烈士赴節於當年弟雖不得芳名風月虛加足獲我志期良久與君長辭曷能吶訥粟斯從事偷生乎緬惟託愛雖曰私交有逾明契言必致信動必先明舉由繩墨不復于逞朗朗鬼獄可血可陳弟死方

得所耳但結慕風雅雖云二載深交未得清心受用每一情至謂長已失耻於君矣聚樂亦死憂煎亦死與其憂也無寔樂也顯顯春島之成欲決三生之志豈謂讒多遠有今日之慮乎要之兩人刎頸生死不啻管鮑兄何足異在乎弟者可謂千古奇遇今惟有挈首領從君耳士死知己女容悅已玉田是素卿知己悅己之人何辭九隕但未得君來蓋棺悻悻也急要畫影亦非無端因連宵夢君方在懷中輒從撓散癡魂驚變半夕號呼忽然覺來猶有怛痛此是從來夢君之慘蓋亦愈知神告矣穀食既絕境味憫斷將以百日齋滿刺血書盟叩於明神願結世世伉儷之約期以中秋節煩君可俟之



改粧

廿三日兩番答札忘復佳期君必恨弟不情矣豈知傷心事有難相告者每一念至數聲長嘆鉛水兩行親親知否期地在弟可成但四下網羅保無不測萬一慮外弟則即死猶安兄為何忍功名為拋佳人皓首非敢調笑寔乃多牽倘果無所惜則弟竟用改粧之策親叩玉扉事屬背城得朝莫陽臺樂死一旦便是真正風流鬼如何如何

鎖關

關門落鎖不敢輕敲納悶空閨愁如年度今番病能消幾夏也不如拚命而出與君死於一處可否俟報

執性 仲春六月子刻

日來委是怨君玉耳太軟以致讒人得志同心兩地中間每多陰懷流間之言但弟耳根頗堅不為傾聽豈特聞君者如此弟處臬黨連密或哀顏泣貌而偽忠或張牙露爪而挾制或遠引覆車之轍或直陳法度之嚴或稱親友言詞或示家君威命或邀截羽翰之寄或誑揚薄倖之名百撼千搖迫我殼中弟衰若無聞惟以真情開諭謂人生固當有死何爭牖下與溝壑為女子不能殺身報知己忘命求仇讐空有此心何從傾吐焉得一日殉情千秋化魄雖不及湘筠二女也須是石梁尾生風雨盈盈靈濤如沸若使名沒為耻彼隋宮漢苑何為未死哉此頭可



斷此中不可移巧說強詞有若蒲團山鬼計盡於此乃勢脅力  
撼以要君耳但仁兄最愛重平日血性何至受其籠絡初聞驚  
死涕泣中宵行雲又來語曰此尚不足泣聞郎君有故人之期  
將復裹裝入越此遊未知馬首如何矣弟聞益駭亦未知果有  
是役否驪車若駕當捐軀化魄以從祇因南征愁怨客懷怕提  
起陽關腸絲寸寸不能再咀此炎孽味也幸明示德音

欲別

是夕別後即欲自刎諸婢乞從死非憐我乃畏禍也因被藏匿  
金刀後來文歸欣然慰我因而癡望風波少息再圖良晤不意  
日來禍患相繼而發羅網密布即一音問艱難百端光景諒無

好日矣窮思無策惟有一死殉君萬無留戀萬無畏苦蓋因鄙  
性堅決寧死離莫作生負只此一念可以報君矣憶得晤期遂  
蒙不鄙庸流許以生生世世永諧琴瑟從此每不樂生喜得從  
旁無人正宜長往先歸恩兄不宜急殉少完世事俟來同遊但  
不宜沉溺富貴功名使孤魄隨風亦抱泉下離居之憾重禱重  
禱瑤札真弟心愛之物向來一字未嘗毀棄計得一百八十件  
又珍贈四種詩悅一幅詞稿二葉俱乞秘藏須弟泉穴之年懇  
求一首斷腸碑文同此幾物焚於荒土再以杯酒酌我一呼素  
卿信魂弟幽魄聞知含笑來格此時則目可交睫矣從今以後  
恩兄祇如未過鄙人無此一端奇事者芳年行樂勉勵青雲萬



勿眷悼九原深悲逝者冥冥何從賜推無補存沒之緣言盡再添矣難籌遠唱曙色窺牕訣泪千行百不及一惟有良宵掛君清夢以當訴衷耳暫離堪痛何況長別腸絲寸寸即此遠行仰脉征雲魂同滾滾知己無恙再視加餐

欲縊

弟向來樂意金刀今恨勢不能得只將白羅三尺了我一生血性矣恨甚恨甚今日閨中婦明朝泉下人

阻死

必不許弟了者何故弟雖因情勝頗知守禮因君信義干霄肝腸如日忘命思君棄生就死始期作合永願令終恨夫恨勢兩

違故欲暫度鬼關從君後世不意仁兄全無同志百口阻撓目前激憤刻不能待若無幾封愛札索以收藏素卿此時一靈早得追隨左右矣可悼可悼今累弟茹苦如此又無明示使弟去住回惑倘或高義無成不獨罪君并恨君矣望望文君雖則來和奈志已為君死豈同戲語願冀周旋聊俟命至

懇累

弟死後免兄沒事樂得愈加安穩春風得意別繼高音玉鈿金釵瓊簫珠笛如此享受三十年應來顧我泉下人矣目前豈累兄者果若遺禍乞詳示禍端云何俟回再決弟意終不辭一死為快耳



遠禍

為君再活幾日猶可但如來命遠禍之法緩通書須面會如此則有生不如無生何用殘喘兄是安穩弟却莫不就不能從命也弟此身已屬死去賴玉人重生既切感恩亦欲與君共圖久訂如何又是遠話弟情膠意漆石胆鋼心雖百萬集奴何能中阻莫非君意棄捐否弟雖無盛年華色但一片熱心必欲死於天下第一箇渾身風韻滿腹文章真正俊俏才子玉郎生死風流留於多情作伴使世頌述素卿憐才慕義有識有胆且是詭浪丰華唱酬高雅如此則彈琴卓氏執紼楊姬不得獨擅千古雖為失足可耻亦愧於人而無愧於心者豈無竟無同志耶果

欲生弟乞示以顧我何時敢不少延旦夕但亦不可作緩兵之計耳

訴翁

痛心痛心累君如此弟死不足贖唯有一片至誠世世永侍恩兄畧酬萬一耳吳門並未知情不過集計欲阻兄乃假訴尊兄以相制耳事體明明如此君便欲遊何地難道不思面別匆匆便行弟必欲再圖一晤適時腸斷則死不斷則返決不樂偷生片刻者有言在昔倘遇禍患緩則以情終之急則以死殉之斷無爽約速來一晤俟命俟命紛紛磨折認有百憾千戀未能畧提一字矣時勢人情既屬相連何用奄奄苟活遄死為快從來



捨命圖歡豈為安然易得連交一載除別半年南還至今欲面  
十三番寄書十五札君無片言進退第一字逡巡兩兩皎日何  
故反因一臬遂構狐疑滿腹一云叩關難是絕見也一云外卸  
內連是絕聞也一云兩作遊地以避其鋒是永永絕交也第九  
死不辭而君棄言若此此言出於君口發於君心不得不急兄  
使傳聞疑信各半至今則有心摧腸裂者矣尊翁危思無恠其  
然仁兄實有所見何毫無主意若此弟反覆懇言只為一情字  
生死旦暮只為一情字豈無榮辱之戀恩愛之貪者固不敢負  
此兩字一概拋擲以報盟兄幸賜三思莫墮計中徒使群陰得  
志

遠遊中止 廿九日初刻

尊翁光景如何禁制之說一一遵依否仁兄主意如何弟歸寧  
之興已消若仁兄以弟行為踈濶交踪可捐衆忌此老成之見  
弟將從初七日返舍隔幾日纔歸可否遠遊中止且得一寸安  
心但可惜夢別陽關司馬青衫空洒許多血泪都沒處算賬且  
喜且悲

長別 維夏十九日戌刻

別來搵腸剝肚慘痛絲絲勺水不能入口昨午因離別在即衷  
言未盡緘函相囑纔及數言亂懷摧裂一時死去奴婢呼救如  
夢初回勉欲完緘可憐頭目眩亂一筆不能動矣不忍將長篇



苦苦只得以半札投寄知心人諒不為罪也夜來拜君華翰令人痕上添痕待要不相思除是當初不認識至今日矣萬勿提起他言徒損愁人懷抱諭我絲桐萱草若至撫絃尋芳又難免於思君矣如何如何廿五日離期三日內不識再得一晤否可憐生死長別在此一舉敢不竭力圖之念今日雖不得朝莫荆生尚有魚鱗鴈足一別天涯何從風便即欲寄書又難輕託思之只有怨死只有恨死若弟訃音既至千萬臨風憑弔一招宋玉之詞冷煙荒草即是化魄相依之日萬萬僥倖不至於死則不及秋期急求歸棹與君再圖良晤重整幽歡此則神賜天憐未必何如者矣但思兄黃昏孤館誰同愛護別求佳耦共此

芳年如此則君既忘憂弟當少怨速以行之青絲髮數縷贈君為來世後期之約幸為藏好勿用示人哀緒觸端不盡欲語愛弟蕭拜別子齊思愛可意親哥哥

強晤

明日欲強出晤兄一面縱不能美滿或因一笑而消愁猶延旦夕死也

又

今日圖成一晤強是病後追尋夢裡但成否未決萬一無成莫以介懷有傷貴體也愁緒皇皇不能盡語正是欲言祇恐傷郎意擲筆依依不敢書



併附詞三首

來何期去何期含泪偷彈結柳枝君行所恐遲  
憶佳期盼佳期莫待風吹連理枝花殘歸已遲

其二

雨如絲泪如絲倩女佯狂未是癡誰與話相思  
魂如隨夢如吹越水吳山好伴伊緣慳生死悲

其三

夢闌喘細又聞唱陽關把魂驚碎頃刻雲山千里煙波弱水悠  
悠何處蘭舟繫滿秋江芙蓉憔悴冰絲暗斷玉簫空切黯然  
無語

附詩一首

深夜重門何處敲支頤獨坐月來嘲粧臺憶有金錢在爰整心  
香問六友

贈藥編終



附錄

告先祠文

維崇禎十有三年某月某日孫男似儔同叔殊弟似禽似鷄等  
謹率次男韶叩告於先祠下竊惟閨門之道貴乎有別敗家之  
禍莫如淫行今次男所娶吳氏持身不謹大節已虧親黨所聞  
奴婢所見穢跡彰著神人共憤痛遭家之不造念七出之有條  
遵古明訓立與決絕止因氏父遠行大歸無主姑先囚禁別室  
聽其自裁今事跡愈昭必不可宥即行休出以肅家範敢告祖  
先惟其鑒之

出婦書與吳水蒼



瑤謹啟罪婦實狀前已馳奏本欲嚴禁以待駕歸處分而事至今日萬不能待寒家豈能長為吳先人之其罪孽乎謹執古禮并據明律敢告高門義與永斷婦德所重曰節曰孝不孝不節何以為婦氏性佻蕩罔知倫理不恤人言立秋之夕乘瑤應試南中假託提瓜潛通外賊惡奴惡婢口供確寔至供有夏間瑤瑤鄉讀詭言歸寔密從私奔內家先知郡城元布此不節之大犯七出之條者穢跡漸露家嚴驟知一忿成病瑤試歸日正當危迫幾陷瑤為萬世罪人至家慈久恙及聞敗行示以詰責任深不遜反致家慈幾為忿傷此不孝之大犯七出之條者丈夫之義謂宜手刃以報父祖并報高門而親族勸言遣令大歸事

在高門死生唯命愚父子仁盡義至皆裂肝剖詞盡於此永不  
再聞

### 與父書

切惟兒婦吳氏雖素性淫行而一經姑訓非禮不行韶素敬之因不甚防之豈意韶應試南歸忽有偷桃之謗大人聞之休出以肅家範即兩孫韶不無有疑因亦弗子豈淫物恣其仇口致吾門有偷媳之公敗節之姑媳姊妹罪不容於一休何怪親友之嘵嘵也前婦有書至備言獨居之苦楚甘心改過歸韶於身書云爾我之不通則是公之絕吾好也婦母家半載無外幸無變志雖有一二微疵大抵狂童之狂非兒婦本意也如必以數



載之夫嬪棄之一旦一局之遊戲律在七出無論刻薄無情即朝廷必以惟薄不脩責夫人矣何至淫婦之敗節於太史之前程哉昔武則天以淫行而治天下兒婦之行未必非許氏之福不若及早迎歸不使郡城宣布家醜夫婦飄流兩地若必欲為部再娶即婚家誰肯以無瑕之閨女續有玷之家門耶惟人原情察理即刻迎歸以篤親情以樂唱隨一舉而兩得矣

玉田札補

僕自庚郊得見仙姿寤寐為勞秋已逾三春將屆四未知何地何時再覩我玉人也竊惟崔鶯待月艷羨千秋卓女聽琴情高萬古僕不敢自附於君瑞相如之末然觀書之下未嘗不欲得東隣蕭寺之人也既逢姝貌能勿狂癡乎况月裡姮娥竊藥以宵奔機宮織女臨河而渡巧天上亦有幽歡人間可無韻事乎可通花源之路我將浮仙客之槎



夫閨閣限相內外間截慎密至矣故墻茨之什聖人所以著之於經其旨嚴矣若乃淫亂性成以隱秘罔聞遂致肆惡不反如吳氏者國人亦共惡之故有堪笑石門關不緊却教仙子去偷桃之謂司成雖微有所聞堅欲擯斥未果而卒而文君畏嬖翁勢隱忍苟容其慵濁昏憤有玷士林容何足貴至如重雖復溺死何所裨益而氏之桑落黃隕雖悔何追實可羞之甚也僕行此編率筆錄之因題曰贈藥甚矣淫蕩之風有逾鄭衛百有餘年惡名未泯後之覽者其可謂諱秘罔聞也而可忽諸可痛也亦可哀也凡事之見乎隱顯乎微非相也外然也吾人尤宜慎之



乾隆二十六年仲冬晦日破山樵人識於香山之夢花書屋





辛未霜降借觀  
一過記於誦芬室



